

La chamischa da notg da mia tatta

DA MARIA CADRUVI

■ **Mia tatta ha pli probabel durmi si'entira vita en chamischas da notg alvas. Quel patratg m'è vegnì tut spontan ina dumengia a bun'ura, exact set emnas avant las elecziuns per il parlament federal.** Jau era gist vegnida or da letg ed jau hai stuì rir tut suletta perquai che ni mia tatta, ni elecziuns, ni chamischas da notg m'occupavan vairamain lezza damaun. Ma jau hai lura tuttina filà vinavant quest patratg. Cura ch'jau sun naschida aveva mia tatta 60 onns. Jau n'hai mai vesì ella en chamischa da notg. Quai ch'jau ma regord era ella adina en nair. Il di en nair. Ma la notg forse en alv. Cun 60 onns n'ha ella franc betg pers bler temp per eleger sia gardaroba. Er uschi-glio era bler gia decidì da lez temp per ina

dunna maridada: en chombra da durmir, en cuschina, en vischnanca, en baselgia. Dus onns avant sia mort ha mia tatta survegni il dretg da votar ed eleger sin plaun federal. Jau n'hai betg idea, schebain ella ha fatg diever da quest dretg cun passa 80 onns e schebain ella era satisfatga da finalmain era dastgar cundecider.

«Jau na vom betg a votar, i fan tuttina tge ch'i vulan giu Berna», aud'ins adina puspè. Cler ch'i fan tge ch'i vulan, er a Berna. Perquai dependi fitg tgi che nus elegiain per laschar far. En quest senn savain nus «mo» cundecider.

Ma sch'i va sco avant quatter onns, lura è l'entir cumbat electoral, inclusiv in pau brimbori, stà per il giat, almain per dapli che la mesadad da las electuras e dals electurs dal Grischun. L'onn 2015 n'han 54% betg gì mirveglias da las elec-

ziuns per il parlament federal. La participaziun grischuna è stada magra cun 46%.

Jau mezza vegn ad eleger cunzunt dunnas (ma sa chapescha er insaquants umens) che ma persvadan cun lur ideas e cun lur engaschi. I dat bleras chaussas en la vita nua che nus savain «sulettamain» cundecider, pia nua ch'i vegn resguardà era tge ch'ils auters decidan ed elegian. Gist perquai èsi impurtant da far la differenza tranter nossas elecziuns per la cuminanza nua che mintga vusch quinta e nossas elecziuns privatas. La chamischa da notg da mia tatta era definitivamain sia chaussa privata, che la chamischa saja stada alva u naira.

L'autura è pensiunada ed ha bregia da chapir ch'i dat glied che n'ha betg interess da questas elecziuns.

